



FRidericus natus est Osnaburgi in Vuestphalia honestis parentibus Ludouico & Anna Staphylis, anno circiter 1514. Cum autem is felici ingenio frueretur, parentum consilio operam literis dedit, & prima rudimenta in patria percepit. Interea uerò utrunq; parentem amisit, atque in Eberhardi Birckmāni auunculi mercatoris tutelam peruenit. Solent autem mercatores Vuestphali longinquo res Septentrionis partes mercium commutandarum gratia frequenter accedere. Itaq; Eberhardus ipsum Fridericum ex Vuestphalia Amstelredamū secum perduxit, & pōst Hamburgū peruenit, ubi etiam in ostijs Albis fluuij Saxonix naufragiū passi sunt.

Inde Gedanum nobilissimum Prusix emporium concessit, & inde in Lithuaniam progressus Caunæ & Vilnæ permansit. In eo loco Staphylus apud cognatos suos aliquandiu uixit, atq; utranq; eius regionis linguam Ruthenicam & Lithuanicam egregiè didicit. Nobiliores enim ac aduenæ utuntur Ruthenica, plebs uerò Lithuanica. Postea Cracouiam in Poloniam abiit, & in eo gymnasio Græcis & Latinis literis magna diligentia incubuit. Cum hoc modo in linguarum & artium studio utcunq; profecisset, in Italiam contendit, ac Romę cum Ioanne Hotfilter Episcopo Lubecensi ad tempus habitauit. Inde Paduam peruenit, atq; Theologiæ operam dans, Petri Lombardi scholasticā interpretationem auidè audiuit. Ibi cum aliquandiu uixisset, Gedanum rediit, atq; subsidio ab amicis impetrato celeberrimā academiam Vuitebergensem petiit anno 1535, suæ uerò ætatis 21.